

Powšitkowne WOZJEWJENJA

njedźelu, 13. měrca 2022

Wusyłanje Božej mše

Serbskorěčnu Božu mšu móža wěriwi tutu njedźelu, 13. měrca, znova jako livestream w interneće scěhować. Kemše přenjesu so w 9 hodź. z Chróšćanskeje cyrkwy. Link na nju je w interneće pod www.posol.de a na wosadnej stronje podaty. Z Kulowa wotnětka kemše hižo njewusyłaja.

Ekumeniski póstny seminar w Smochćicach

Dalše zarjadowanje we wobłuku ekumeniskeho póstneho seminara w Smochćicach wotměje so pónđzelu, 14. měrca, w 19.30 hodź. Něhdyša wjesnjanostka Zemic-Tumic Gisela Pallas a Njebjelčanski wjesnjanosta Tomaš Čornak přednošujetaj k temje „Zhromadnje cyrkej we wsy wostać“. Hosćej třećeho přednoška k temje „Zhromadnje do Boha wěrić“, pónđzelu, 21. měrca, w 19.30 hodź. staj Esther Hirsch a Osman Örs, teologiska referentka a imam mjezynabožinskeho projekta House of One w Berlinje. Póstny seminar zakónči so pónđzelu, 28. měrca, z filmowym wječorkom.

Zetkanje samostejacych

Samostejacy ze serbskich wosadow su na swoje přichodne zetkanje wutoru, 22. měrca, w 14 hodź. do Smochćanskeho kubłanišća swjateho Bena přeprošeni. Zajimcy njech so prošu hač do wutory, 15. měrca, w redakciji Katolskeho Posoła přizjewja, telefonowe číslo (0 35 91) 55 02 12. Štóž chce wotewzaty być, njech to prošu zdźěli. Wobkedźbować maja so tohorunja potom płaćiwe koronowe regule.

Přidatna zběrka

Serbske dekanatne dušepastyrstwo za džěci a młodžinu hromadźi pónđzelu, 14. měrca, wot 17 do 19 hodź. na starej šuli we Wotrowje hišće raz dary za ukrajskich čekancow. Kotre twory měli to być, je pod www.posol.de wozjewjene.

TCM hromadźi pjenjezy k podpěranju ukrajskich čekancow

Towarstwo Cyrila a Metoda z.t. (TCM) hromadźi ze swojej akciju „Łužica pomha“ pjenježne dary za ukrajskich čekancow w Pólskej. „Smy so tuž dorozumili, zo přewostajimy dary Cariće w Etłku. Jeje direktor a naš dołholětny partner, prelat dr. Dariusz Kruczyński, je nam rjekł, zo pomhaja jim tuchwilu najbóle pjenježne dary. Trěbne twory za čekancow móža sej tam kupić. Ručež pak bychu čekancy do serbskich wosadow přišli, bychmy džěl darjenych pjenjow za nich nałožili“, rjekny předsyda TCM Jurij Špitank. Štóž chcył domapytanu ludnosć podpěrać, njech přepokaza pjenjezy na konto TCM: Cyrill-Methodius-Verein e.V., IBAN: DE 65 7509 0300 0008 2823 66, hesło: „Ukraina“. Štóž sej darowansku kwitowanku přeje, měł swoju adresu podać.

„Prošu zdobom, zo by kóždy sprawnje pruwował, hač by jednotliwych čekancow pola sebjem přiwzać móhl. Podpěramy wotpowědnu namołwu biskopstwa“, doda předsyda TCM.

Towarstwo swjateje Filomeny prosy wo podpěru

Duchowny centrum rjadu oblatow w ukrainskim Obuchove je so na nas z próstwom wo wobstaranje transportneho jězdźidla wobroćił. Te je k zastaranju tamnišnje ludnosće ze žiwidłami nuznje trěbne. Prosimy tohodla wo pjenježnu podpěru na naše konto: St. Filomena e.V., Volksbank Dresden-Bautzen e.V., IBAN: DE 55 8509 0000 6036 0810 05. Za kwitowanku za financny zarjad podajće prosu swoju dospołnu adresu. *Gerat Róbl, předsyda*

Putnikowanje swójbow

Lětuše putnikowanje swójbow do Różanta wotměje so pjatu póstnu njedźelu, 3. apryla. Boža mša wonka zahaji so w 9.00 hodź.

Jězba w lěću za šulerjow 5. do 8. lětnika

Dekanatne dušepastyrstwo džěci přeprašuje šulerjow 5. do 8. lětnika w lětnich prózd-
ninach na jězbu do Lückendorfa w Žitawskich horach. Wona wotměje so wot póndzele
do pjatka, 15. do 19. awgusta. Přizjewjenja přijimuju hač do soboty, 30. apryla, online.
Link je pod www.posol.de podaty.